

海南地方志丛刊
海南地方文献丛书编纂委员会汇纂

民国 文昌县志

下册

李钟岳等监修
林带英等纂修

海南出版社



海南地方志丛刊

海南地方文献丛书编纂委员会汇纂

主 编 洪寿祥

执行主编 周伟民

民国文昌县志

下册

江苏工业学院图书馆
藏书章



海南出版社

图书在版编目(CIP)数据

民国文昌县志/李钟岳等纂修;吕书萍,王海云点校.
—海口:海南出版社,2003.1
(海南地方志丛刊)
ISBN 7-5443-0559-7

I.民... II.①李... ②吕... ③王... III.文昌县
—地方志—民国 IV.K296.64

中国版本图书馆 CIP 数据核字(2002)第 069239 号

民国文昌县志

吕书萍 王海云 点校

责任编辑:袁大川

*

海南出版社出版发行

(570216 海口市金盘开发区建设三横路 2 号)

全国新华书店经销

湖南新华印刷集团有限责任公司印刷

2003 年 1 月第 1 版 2003 年 1 月第 1 次印刷

开本:880×1230 毫米 1/32 印张:31.75

字数:561 千

ISBN7-5443-0559-7/K·71

定价:82.50 元

卷八 人物志

乡贤 儒林 孝友 忠义 懿行 文苑
笃善 高逸 耆旧 方伎 列女

盖闻天命之理，即人而存，岂不谅哉！邑治滨海，见闻恐不广也。然如邢湄邱之高风伟绩，载在《明史》尚已。此外，循声亮节，励行积学之士者，考其行事，质诸古昔，所称盖有合焉，岂必以地限哉？兹因《旧志》所载各类，博采舆论而附列之，以寓维世励俗之意，后之人可以兴矣。志人物。

乡 贤

明

邢 宥，字克宽，号湄邱。先世仕宋，充纲使，始迁琼。宥少游邑庠，为学师曾兰所重。正统辛酉乡荐，戊辰进士，任四川道监察御史。牛《志》景泰改元，籍太监王振

家，有告振家人孙太安匿其财者，鞫之无实，或必欲没人之，且曰：“不然祸立至！”宥曰：“无其情，而文致于法，是我杀之也。”竟辩白，被诬者二十人。明年，督运通州粮实宣府，措置有方，边储悉足。出巡福建时，沙寇甫平。或言延平卫军多其亲党，欲以东卫互易之。镇守尚书薛希璉力主其议，宥曰：“山海异习，轻动或生他患。”卒得不动。巡海官获犯禁入海者十数人，请梟首示众，冤号之声震地，宥请缓之。未几，果得真盗。乱后增筑永安等四城，民力有不堪者，宥奏留八郡之匠赴役工部者协助之，城得以亟成。邱濬撰《墓志铭》巡按辽东副将焦礼有边功，主将曹义欲冒之，都御史寇深为曹嘱托，宥弗从。复按河南，奏革循河出颖达南京数十驿，风裁震于一时。郝《通志》天顺庚辰，出知台州，一尚宽以矫前弊，民甚信服。居台四年，两以巡按时事就逮，民数千人赴京告留。黄《通志》竟坐是，降尹晋江。未三月，会赦，牛《志》宪宗复其职，改知苏州。奸民揽纳秋赋，置之法，得其贼万缗，以堤沙河甃官道。《明史·刘孜传》苏之田赋甲天下，丁役杂办倍于他郡。宥治之一本情理，惟省徭均赋，节浮费，以便民为主。凡百有为务，从素简。成化丙戌，江南大水，而苏尤甚。牛《志》作丙戌，郡大饥发官储，劝富民，得米八十余万石赈之，然犹不继，饥民持券入富家强夺。因贴示官，为署券付乡老，俾同保借，又不继，乃会计军饷一年之外，余二十

万石，发以赈之。同官有以事未上闻难者，宥曰：“民命在须臾，奏允而后给则无及矣。专擅之罪，吾自当之。”是岁稔，活饥民殆四十万口。《墓志铭》宋杰荐于朝，诏加浙江左参政，仍治府事，赐玺书。居半载，遂以右佥都御史代杰巡抚江南十府。《明史》升左佥都御史，总理兵民财赋，并理嘉、湖、杭三府粮储提督屯种。宥受命，汲汲于培植、拯救、采察、咨询，于官吏则奖廉能，黜贪懦，于民则杜奸宄，抑豪右。浚孟渎、丹徒二河，增筑奔牛一闸，以便运道。又奏减岁课之重者十余事。戊子，奉敕飭理两浙盐法。己丑，又敕考察文武官员。凡军民利病悉听从宜处置。《墓志铭》前后五奉敕书。庚寅，议事上京，再上章，始得致仕。宥禀性廉介，于人不少假借，外朴内明，好读书诗。文不苟作，作必意趣，字亦遒美有法。处家庭孝友，田产多让诸弟。归休囊橐萧然如书生时。所著有《湄邱集》。

黄《通志》

韩俊，字克章，号木山。性宽厚有制。成化丙午乡荐，弘治丙辰进士。主政刑曹，奏议平黎策，升副郎，以忤刘瑾见黜。瑾败，起祠祭司转刑部正郎，迁河南副使。考天下廉能第一，卒于官，橐无余积。

林华，字原积，号仰虞。嘉靖辛酉乡荐，隆庆戊辰进士，授九江府节推。廉明耿介，革饶府夙弊，平反郑茂等冤狱，清望赫然。南畿操江陈某闻其贤，特荐之，行取

入京,升南京户部主事,转运边饷二十八万,支羨二千余金,悉上闻。出榷九江关税,羨余贮府库,一无所携。卒于官。夙志正学,王懋德、邢栻皆出其门。俱《旧志》

王懋德,字敏中。嘉靖甲子乡存,隆庆戊辰进士,授刑部主事转工部郎中。萧《志》由南京比部郎出为金华守,前后无善去者,独以廉察擢江西按察司副使,萧《志》作出为金华府,历九江旋晋福建右参政。年五十一,无子,多饵燥药。摄建南篆,归得消渴疾。先是延平人有病此者,以溺甘为死,候自试之,甘度不可起,乃请归。不允,慨然曰:“懋德之违定省十有六年,愿万一生见父母,死且瞑。不然,即死道路,吾志犹南首也。”时父良弼及母皆八十余矣。于是遂行,僚友争致赆,固却不受。行至延平之将乐,不能前,竟卒。卒之日,神爽不乱,遗书谢僚友,誓不受奠赙。使者以为不可,遂循故事,括六白金,遣使传护之渡海。至,则授金封君。良弼不受,曰:“吾子业有成言,吾即耄,奈何取六白金以伤吾子之义?”阮《通志》

赵志科,号清轩。初以刘姓领嘉靖辛卯乡荐,后复姓计,偕领公车费六十金。旋以母病还官,终身侍养不仕。尝手录本《县志》,为周守柳塘所重,称为清修博雅云。性冲澹,乐易温和,人爱敬之。并祀书院。

陈表,字子展。性恣行端。领嘉靖癸卯乡荐,授书里中。上议两台,革长岐、宝宰两驿,岁灭邑费数百金。

知桂阳州，济贫儒，核侵冒，省冗费，疏止采矿，桂民甚德之。寻迁知岷州。宦归，无异寒素，而能济贫，泽及枯骨。年七十余终。

邢文成，字道蕴，号耕野。业儒不售，然好之愈笃。行正施博，至老不倦。厚延名师教子，虽破产倾家不惜，是以果食其报焉。子裔昌，举于乡；祚昌成进士，以德安府考满，封父如其官。俱《旧志》

陈是集，字虚斯，号筠似。秉性清介，少慕海忠介，为人不沾沾于章句之学。登天启辛酉乡荐，崇祯辛未进士，官中书舍人。给假归养，道闻父丧，匍匐抵里，哀毁骨立。服阕丁母艰，亦如之。还京供职，出使蜀粤。诸王孙奉千金，请关说宗禄。时学使与同籍请留信宿，代治行装，俱却之复命。有壬人索金不遂，竟嫁祸逮狱，狱吏悯其冤曲，为调护。时宫詹黄道周同羁在狱，相与讲学不辍。壬人复欲以朋党中之。会事白，复官归家，杜门读书。遭国变，凡自经、饮鸩者，再为家人所持，不获死。乃屏处一楼，足不履地，被发鼓琴，悲愤恸哭而卒。所著有《中秘稿》、《南溟诗选》。参《旧志》及本集

清

林运鉴，字千史，训导垚之子。领甲子乡荐第五。夙矜气节，事亲先意承志，友睦兄弟、宗党。居父丧，哀毁骨立。授江西瑞州高安县知县，革一切陋规，催科不事鞭

扑，躬亲劝稼，步祷捐俸。建文昌阁，集诸士诵习其中，置义田为膏火资，人争奋励。辛卯乡试，邑中登第者七人。分校闾中，所取皆知名士。禁溺女，建义冢，折狱严谨，案无留牍。遇重辟必婉转开释，无再生路，然后申报，人皆以菩萨称之。任七载，两以清廉爱民报。最念母年老，屡告终养不获。因忧民成疾，卒于任，里巷悲哭。崇祀名宦。康熙五十四年，本邑举乡贤，呈请学县，经详府道提学批允。

右俱祀乡贤《旧志》

张日旻，字穆侯。乾隆丙辰进士，选云南宜良县。政尚简易，以课士训农为务，奉委修银汁河，捐俸金千余。开张子沟于北屯四十余里，灌溉陆凉、路南、宜良三州县，瘠土皆成膏腴。邑人建报德祠于河头，营肖像祀焉。调新平治，如宜良，寻署路南州事，告养归。居父丧，庐墓一年，以毁卒。宜良、新平俱祀名宦。《郡志》载《名贤》

黄玉霏，字天白。中乾隆辛酉举人，乙丑会试明通榜，任吴川教谕。时士习浮靡，霏独敦实学，与诸生讲明心性，成就者众。吴川诸生预设长生牌位，祀书院，并名宦祠。以事忤上官，削职归。教授生徒，从游益众。性质淳厚，砥励廉节，遇事从容，裁制无疾言遽色。吴川及琼诸生，前后欲为霏捐资复职，拒谢曰：“诸君欲某以贿进耶？”众高其义。明《郡志》载《儒林》

云茂琦，字以卓，号贝山，又号澹人。嘉庆丙子举于乡，道光丙戌成进士，分发江南，补沛县，调六合，官至吏部稽勋司郎中。少聪颖俊发，屡为当道推许。乙酉留京，读《王阳明集》，忽自警省，以圣贤为必可为，作二箴揭之座右，以责前警后。通籍后，初宰沛县。沛俗勇荡难治，琦务以德化。狱讼无留滞，不轻勾摄其情。虚诬及案情轻者亲讯，数语或释、或结。又时出内檄集犯狱具，而吏不知所以，两造齐服。随教以敦伦睦邻，娓娓不倦。邑故多盗，琦责里保，访窝主，捐廉缉捕，获尤置法。有巨盗聚党，历任不能捕，琦突至其穴擒之。时已调六合矣。书院久废，捐金修葺。又自备修金，延师主讲，仍亲督课，示诸生以身心之学。万寿宫、泮池、名宦、乡贤各祠、更衣厅皆为重修，费自己出。城南桥久圯，琦邀捐重建，士民德之，因名云公桥。及调六合，士民请留不得，攀辕泣送于道，輿不得行。六合素繁华，琦裁陋规，减秤余，手著训谕，大意以禁游惰，崇节俭，敦礼义，戒左道为务。邑多淫祠，而万寿宫、龙王庙、先农坛久缺，书院湫隘，琦毁诸神像而易置之，规模大备。书院乏膏火，捐廉为倡，众皆乐捐，至万余贯。复捐宾兴，益以役欠追赔，田产乃充裕。辛卯水灾，请帑赈济，并劝捐、采买、平糶诸事毕举，民赖以安。奉旨议叙，卫丁疲敝，逋负累及殷户，乃劝捐经费，详解发典生息，以充其款。择绅士董其事，捐银十余万，自捐银

为解费,详解上宪。奉旨眷黄,卫丁赖之。旧有种德堂,经费不足,琦劝捐续之。每岁施棺木,收养病饿,全活无数。壬辰分校江南,所得皆知名士。丁酉入都供职,部务较简,日与士夫讲学,兼求天文诸书。甲辰,以亲老乞养归,主讲琼台,改造书院大门,添设斋舍,考棚前地洼积水,并砌以石,皆其设法捐资以成。又联捐修县城池、炮台等工。生平自奉俭约,在官不演戏,不为生日,而乐行善事。所得俸余,捐邑宾兴二千余贯,捐本族阐道堂宾兴,建试馆于郡,置种义田经费,以助近亲婚嫁、丧葬、小学脩脯、添各祖蒸,尝计五千余金。近乡各桥、道、社、约,皆不惜劳费为之,其余置产与弟偕焉。在书院,示诸生首及立志敦行,论文之余,劝以实学,规矩严肃而词气冲和,人多爱敬。自治甚严,独处时每闭目静坐,尝曰:“凡人恶念易除,杂念难除,静坐则杂念消而天理自见。”晚年躬行实践,有油然自得之意。年五十九卒于琼台。著有《探本录》二十二卷、《实学考》四卷、《阐道堂遗稿》十二卷。

郑乃宪,字仲钦,号柏山。志行坚卓,每事致其精实,事亲致敬尽礼。所习《经书》,不矜淹博,必考核精详,加以体验。为文限于义理,独抒心得。困诸生垂二十年,益自奋励,绝无忧愠色。自治甚严,暗室独处中,常自敬慎。凡儒先粹言,抄诸座右。对人和蔼,不立崖岸。所教人循循规矩,有过辄面责,受之者卒自感奋。立社于乡,行蓝

田吕氏乡约,乡里敬服,家贫不可以财利动。主讲琼台五年,与当道交接无私言。为诸生时,琼山粘克光、定安张岳崧莫逆交也。粘终于廩生,贫无以葬,乃宪助之。张历官中外,常以书来,简于裁答。迨计偕入都,道晤于湖北藩署。二人各以学行相质,漏数下不休。后张修府学官并《府志》,引为同事焉。道光辛巳元年,举孝廉方正,辞不就。壬午登乡荐,丙申会试荐卷。年六十八卒。所著有《柏山集》。以上《旧志》

韩捧日,字寅侯,号曙瀛。道光丁酉举京兆,庚子成进士,签发云南,即用知县。历署新兴、江川、元江、腾越、顺宁等厅州县,皆以廉明著。檄署保山,此地甫经兵燹,四野一空,初委二员,俱不肯赴任,公毅然不辞。无奈汉、回仇怨极深,因回民京控,奉提案内人证,汉匪遂聚众夺犯城中,有上年招复回民数十避入县署,汉匪越城而入,焚县署而屠戮之。是时城乡鼎沸,文报不通,驻城兵不盈千,又半汉奸耳目,官同釜底之鱼,民若社中之鼠。捧日聚僚属泣曰:“性命小也,而城池为大。一息尚存,岂可不为保全之计?”乃阴扬言称回匪已聚众报复,汉匪颇惧,因得藉防回为名,调邻邑兵练城中,稍有防备。制军林文忠公闻变,统兵以征,示令献俘免诛。捧日乘势开导,遂遵示献俘。初则藉渠魁以剪羽翼,继因羽翼尽而及渠魁。先后获犯四百余人,首要无一漏网,良民无一波累。文忠

以與情愜恰，办事有条理，人奏请留，办理善后。捧日招集流亡，亲历村寨，择地安插，请发经费赈恤，不遗不滥。捐廉修治县署、书院，被毁者鸠工重建，增置膏火脩脯，延师主讲。去之日，衿耆焚香进酌者相属于道，遂建祠，设文忠公同捧日禄位祀焉。寻署永善，值大水害民田，流殍者众。发县廩以赈之，捐廉弥补，不以上闻。调署大关同知。始至，系囚满狱，捧日区判善恶，或释或结，境内以为不冤。郡守心善之，荐其为守，兼优安详勤慎。咸丰癸丑，补邱壮县事。邱俗勇悍难治，捧日以课士、训农为务，捐修书院，增置义田为膏火资。县西塘堤久溃，沙泥湮塞，民失灌溉之利者千余家。捧日募力工役，修筑堤障，疏浚沙泥。日暴露于塘下逾月，而堤完数十里，瘠土皆成膏腴，民感其惠，名曰韩公堤，合邑制锦称颂。乙卯，分校乡闾，所得皆知名士。丙辰春，以劳绩加知州衔。是年四月，省垣回匪不靖，全滇震动，邻封回匪分股烧杀入境，四乡俱成焦土。县城系土墙一道，内无兵饷，外无救援，危如累卵。捧日筑炮台，浚城濠，集练固守。贼匪围攻两次，激励兵民，人皆效死，与贼十余战，皆大捷，捕斩不可胜计。贼匪远扬不敢回视。逃来难民，设粥厂赈济，并采买平糶。时疾疫大行，制药饵、施棺木、收养病饿，全活无数。城外尸骸遍野，募人收殓为大冢以瘞之。是以屡濒危殆，民无去志。大宪以为能，题升开化府安平同知，旋

以革。副将陈得功党羽率匪突入县城,捧日自知不免,冠带升堂,从容受害。制军张公亮基具奏,奉旨加赠知府衔并云骑尉,世职袭。次完时,给予恩骑尉,世袭罔替。捧日天姿聪颖,经史百家贯串匪遗。晚年,益讲求心性,尤服膺程、朱之旨。处家庭孝友,自奉俭薄廉俸,所遗寄周姻戚族党。每师友缓急,必竭力相助。当官明恕,所至有声,然性劲直,不事夤缘,故谨以郡丞终,未竟其用。生平著作失于兵火,今偶得其遗稿,咸珍理焉。

、 林燕典,字赐阶,号跻堂。聪慧好学,为文清真雅正,名噪一时,由廪生举道光辛卯乡试第六名,甲辰成进士,签掣江西。初署崇义,案无留牍,尤务以德化民,无鞭箠而民自畏服。邑本先儒王阳明故治,专祠久圯,乃捐廉重修。日集士民,谕以志阳明之志,学阳明之学。仿胡安定分门课士法,问字之履,户外常满。公余履乡问民疾苦,勤课农桑,民忘为长官鸡黍饷遗,感其情,不受其物。继补永丰,行蓝田吕氏乡约,捐俸六百两建育婴堂,收养之,溺风渐革。又刊圣谕及性理精义,谄饶学师宣讲,助成德化。庚戌,邑苦饥,衔命赈济,全活甚众。又捐廉三千金以永恩江、求志两书院弦诵之声。己酉,充乡试同考官,所得皆知名士。尝夺势豪霸民田千余亩,断归原主。有讼棍负富人债,转以匿子毙命,捏控悬案,多年竟弋,获其子以归罪。其折狱如神,不畏强御,大率类此。以至设团

练、修学宫，筹输数万为防备、典礼之费。后以丁外艰去官，永人如失慈父母。归装萧然，匍匐奔丧，哀毁尽礼，不入内室者三年。主讲定安尚友、琼山雁峰、文昌蔚文书院。明实学，去华浮，士风为之一变。晚年纂辑《县志》，修宗族谱。书志在敦实行，不慕著述虚名，士论伟之。

吴憬平，字秩卿，号南洲，又号南蕉。由廪生登道光丙午贤书，供职秋官。咸丰己未，充顺天乡试，内收掌十余载，晦迹潜郎，不干权贵，而都人士多与之游。鸿胪寺卿邓承修、殿撰梁耀枢，咸推重之。逮耀枢视学山左，慰问不辍。辞官归里，主讲琼台、苏泉、蔚文书院。教授生徒以讲明性理为宗旨，一时士习为之丕变，登科第者多出其门。观察刘公镇、楚太守朱公丙寿重其文行，以“多士矜式”匾额旌诸讲堂。晚岁，以医术济世扶危起病，全活甚众，而酬值不取分文。北冲溪原收路担税，请官竖碑示禁，阖郡便之。其生平为人，至今称颂不绝。卒年七十六。所著有《朱子学的序》、《二十二史感应》、《四十八孝图谱撰序》及《南蕉遗稿》传世。民国九年祀乡贤。

儒 林

明

林 广，号观澜。明初举经明行修，任本学训导，复以监生中洪武甲子应天乡试，任庐陵教谕。造士有方，出其门者多取高第。晚年精形家言，别详《方伎》。《旧志》载《懿行》，明《郡志》载《儒林》

赵光先，邑庠生。行仿先民，潜心理学，髦士多集其门。性情醇笃，接人谦恭，衣冠不沿时尚，督学屡加奖之。《旧志》

张守实，字还虚。赋性严峻，夙志理学，常云：“学以无自欺为主。”理学诸书，无不手录。家贫，教授，邑之誉髦，多出其门。少饬府庠，晚年，犹孜孜好学，鸡鸣而起，终日危坐，体无倦容，口无谑言。年八十余，端坐而逝。

清

林遇锦，字尚白，一字文江。康熙癸巳恩科副榜。少与兄运鉴共学，以古人相期勉。兄出宰高安，口占送别句云：“弟兄握别无他语，父母官贫是好音。”后数年往高邑。甫至，兄病已笃，卒于官。扶榇归，高邑人士馈二百余金，却不受。所携回笥篋悉以付兄子，一无所取。生平温让

简直，遇物以诚，羞谈人短，而乐于奖成善类。至事关公道，守正不阿，卓如也。学淹博。晚年，益讲求心性，不与外事。家有藏书楼，昕夕披吟其中，终身不倦。

林湖仁，字带五。乾隆丙辰举人。少孤贫，力学，通大义，性情冲澹，与物无忤。尝被辱于市不与校，其人自悔，卒为感化。遭兄丧，或劝应试，湖曰：“功名所以显亲，苟忘吾兄，何以功名为？”竟不试。尝主本邑讲席，教人以品行、器识为先。邑宰沈永宁不时过访，语不及私，宰甚器之。子人秩，字汝叙，号敦五，恩贡生。文行并优，卓有父风。参明《郡志》

林其笼，字君药，号参翁，竹垠人。乾隆戊午乡荐，乙丑成进士，选授福建永安县知县。政简刑轻，不事鞭扑，以文章饰吏治。永邑地僻民贫，学额八名，壬午闱揭晓，赖涛发解，刘骥抡魁，共中式者七人，皆笼所教育也。治北，四贤祠久倾，捐资倡复。任永九载，士民设禄位配于四贤祠，以公过部议镌级，无级可抵，遂解任。同寅相资助捐复，笼慨然归。主讲至公书院多年，成就者众。庚寅辛卯，邑建学宫、文峰塔，皆董其事。

郑群铭，字跻三，号新亭，水仔人。幼聪颖嗜学，长益淹贯经籍，为文清淳古雅。王安国督学广东，器重之。及王抚粤，复从受业数年。督学沈选取拔贡，竟以年三十五卒。为人志行沈毅，规模宏远，卓然于势利之外。事亲孝